

Per trutgs e pitgognas dals 21-01-2011

Proposta da Joachim Wasescha

Cun gianellas da Salouf sin las aclas da Munter

A Salouf cumenza l'excursiun cun passar tras il vitg. Sur il vitg prend'ins la via en direcziun Pulens. Bainspert travers'ins il Balandegn. Quel'aua vegniva anc duvrada avant paucs onns per metter en funcziun il mulin e la resgia da Salouf e pli baud er ils martels da la ferrera a Flex. Stond sin la via marcada che maina cunter Ziteil, pass'ins ils puncts 1485, 1550, 1702, 1775 e suenter radund duas uras sort'ins dal guaud e bainbaud vegn ins tar las aclas da Munter (1952) al pe dal Piz Toissa, il punct il pli aut da l'excursiun. Durant ina pausa bain meritada gaud'ins ina bella vista sin las muntognas da Surses, sin la Val d'Alvra, la val da Tavau e la planira da Lai. Tar la descensiun pass'ins Tgant Plueischen, las aclas da Planezza e pli tard quellas da Zozas. Tar il punct 1530 dirigia ins la via sur Plaz Minanc encunter Del ed ina mes'ura pli tard arriva ins puspè al lieu da partenza.

Differenza d'atezza : ensi ca. 750 m, engiu ca. 750 m
Lunghezza : ca. 12 km
Durada : 5 – 5 ½ uras

Particularitads:

- Vitg intact da Salouf cun la baselgia da s. Gira, cun la piazza communal deditgada a Pader Alexander Lozza, cun il pastrign, nua che vegn anc oz fatg paun ed il mulin vegl.
- Las aclas bain mantegnidas da Munter e Ratitsch
- Bels puncts da vista
- La fracziun da Del cun la baselgia da son Roc